

QVÆSTIO MEDICA, QVODLIBETARIIS DISPV TATIONIBVS

MANE DISCV TIENDA, IN SCHOLIS

Medicorum, Die Iouis IIII. Ianuarij,

M. ROBERTO PATIN,

DOCTORE MEDICO PRÆSIDE.

Nihilne ab annis Climactericis metuendum?

A N N V S est dierum noctiumque orbis ac circulus, qui & sideris vnus, & omnium eodem vnde profecta sunt reditu varius efficitur. Magnus verèque vertens est, cum Stellarum errantium ad eandem inter se comparationem, confectis omnium spatiis, est facta conuersio: sed & singulæ suum describunt absoluuntque annum, motus, quod duodecim signorum orbem lustrant, tarditate & celeritate dissimilem. Populariter tamen, Solis, qui astrorum obtinet principatum, ad idem punctum reuoluit cursu, ceu vnus temporum dux moderatorque sit, annum metiuntur. & humanæ vitæ spatia: hæc enim brevis licet punctoque similis, multos complectitur orbis circumductos maiores minoribus, nec adeo tacite labitur, quin eius certi sint flexus ac velut articuli, quibus varias in partes distinguitur. Nempe ex tacitis intusque delitescantibus causis, varias quisque sustinet mutationes, quæ ferè magis elucet septimo quoque anno, quem propterea putant signum ætatis, & veluti transitus notam imprimere, nouâ etiam nomenclatione: vt sit primâ annorum hebdomade infans, secundâ puer, tertiâ adolescens, quartâ iuuenis, quintâ vir, sextâ maturus & grauis, septimâ senex, atque inde decrepitis. Ex eone igitur annis Climactericis nomen est? quod homini in lucem edito, dataque vitæ spatia decursuro, ad mortem eundum est, iis quasi gradibus in quibus hærent multi, nec paucis velut in extremo vita finitur.

N E M I N I vnquam vitæ ordo tam eucurrit prosperè, vt non aliquando casibus aut incommodis quibus illa quasi telis proposita est, interruptus fuerit: diuersæ incurrunt temporum velut lacinie, quæ fortunatissimum quemque variis seu periculis seu morbis obijciunt: homini dum anima est, tanquam in palæstra luctandum, cum innumeris quæ illum vndique circumstant malis, à quibus si minus deijcitur, certè inclinatur; non rarè casurus, nisi velut ruinosus paries tibiens:

fulciendus, ad aliquid tanquam adminiculum aduitatur. Hinc annos quibus clade aliqua vita frequentius affligitur aut subruitur, Climactericos, ipsaque adeo pericula *κλιμακτηριος* appellauit Antiquitas. Nec vero vna illorum erat classis, vnaque ratio, alios siquidem finxere leuiore, grauiore alios: & in his quosdam *ἀμεγέδους*, omnes cum nouenarios, tum maximè septenarios non parum conflare periculi, at tertium supra sexagesimum ætatis annum, qui vtriusque numeri multiplicati, & sibi inuicem obligati summam perficiat, hominem in vltimum capitis discrimen nunquam non vocare, sæpius conficere. Eorum etiam annorum, quemadmodum & vitæ terminum statuerunt aliqui octogesimum, vt qui hunc prætereat, stadium currenti similis metas transgrediator. Contrà alij, qui ad primam hominum ætatem respexere, tam longè Climactericorum vim patere voluerunt, quam longè nunc potest vita spe & votis extendi. Vis plura? ne communi lege nascerentur & perirent Heroës, certos & quidem anticipatos ad moriendum annos stultè assignarunt, excitatis illis spiritibus, quos stultius nonnulli perinde ac ampliore opus sit spatio ad dedolandas tam illustres animas, cæteris tardius, ex vteri latebris in lucem exire prodiderunt. His signentis fidem adiunxere turbulentis erroribus mancipati Veteres, ad credendum caruncula vitulinæ, quàm perito Duci paratiores: tanta nimirum priscae nutrix superstitionis inscitia penè omnium animos oppresserat, hominumque imbecillitatem occu-
parat.

QVI nec à numeris, nec à Cæli signis sibi metuit, nihil habet cur annos Climactericos quibus aliunde venire nihil potest, vel minimum reformidet. Numeri certè, quidquid Pythagoreorum turba nugetur, nulla omnino vis est ad agendum, nulla dignitas, nullum in Naturam imperium, si bene ex se æstimeretur, ne vnum quidem aliquid est, sed multorum minimè diuiduorum cumulus, & qui solà mente colligitur ordo: reuera quæ ex Naturæ præscripto contingunt mutationes certis sunt numeris, vel si mauis, in numeratis dierum interuallis, at non tamen à numeris, qui præter spatium ad rerum perfectionem nihil conferunt: non Mare, non Euripus, non febres interpolatæ numeri vi ac munere mouentur, sed aquæ vel humoris ingenio; non horæ, quæ quis animam senio confectus exhaustat, mortis causa accepta ferenda est, sed vniuerso temporis, rectius salutari humoris à vitæ carcèribus vsque ad metas perpetuè dilabenti. Vt in seminibus vis inest earum rerum quæ ex his progignuntur, sic in causis conditæ sunt res futuræ, solo tempore absunt: quasi rudentis explicatio, sic temporis est traductio nihil noui efficientis, sed primum quidq; replicantis. Vana imprudensq; diligentia est, quæ dierum numerum computat, rerum momenta non ponderat. Fauscos, inauspicatos, nefastos, commodosque dies, quosdam vt Calendarum & Iduum, nuptiis alienos putare, Romanæ leuitatis est: Nonis velur ominosis seriæ rei nihil velle inchoare, Imperatoris est seridè desipientis, at exacto Climacterico iuneniliter exultantis. Quid tu sextum in morbis diem cen tyrannum odisti? qui si hunc iugulat, istam seruat: Ipsum Septenarium olim sacrum, Medicisque crassioribus crisis expectatione perperam feriatum, nonne anni Climacterici, *ἀνδρομέδους* vulgo dicti, sæpius infamarunt: & rursus si incendio, naufragio, ruinæ perituro, res est vnius horæ, vel diei, quid attinet annum quem istæ clades non totum occupent. ac non potius dies horæve Climactericas appellare? Vna planè natura est annorum dierumque omnium, quos ex atris albos facit, qui fortiter & virtutis auspicijs geret omnia.

SIMILIS est vecordia quod sapientibus & Ecclesie detestatum genus hominum, potentibus infidum, sperantibus fallax prædicat, ad agendam vitam nascendi tempus pertinere, perindeque ut fuerit cælestium orbium *διουξία*, occursive maleficorum siderum pulsatus cuiusque horoscopus, ita vitam longiorem breviorēque destinari, corpus, mores, animumque formari, alias atque alias fortunas dari, seruos ad regna, captiuos ad triumphum vocari. Diluenda miseratione hæc commenta, ex eorum profecta cerebro qui pro Numinibus habuere planetas, tracta etiam ab his *ἀνδρ* appellatione (namque Græcis *ἀνδρ* currere est), qui Cælum impleuere fabulis, trigonis, cuspidibus, concinnatisque ex vario Stellarum cœtu, belluarum imaginibus: ac ne quid ex esse ætuum obseruatione natum videretur, Monstrorum ut Capricorni effigie. Quo modo in Pictorum, ita in Astrologorum pergulis picta sunt omnia, solidi nihil ostendi potest; aufer quas isti temere consecrarunt bestias, tolle nomen Veneris à Stella sic vocata, simul & ficti Numinis vim ad creandos libidinosos, & artem quæ id docet, sustuleris. Rerum naturam verit; excusandæque nequitie asylum aperit, qui Stellarum imperio concruisse hominem, hisque ducentibus tanquam *ζῷον* *ὑπερφύσιν*, huc illuc circumagi autumat: propter Deum homo, propter hominem mundus factus est, ipsaque sidera, quæ præter calorem & lucem nihil sunt ex alto; alioquin ubi homini homo lapsus est, nulla Stella non est *ἀνθρώπου* *οὐρανῷ*; Vtinam ludicra nulloque scientie fundo conceptæ artis authores expectant, cuius sideris iniquitate sit, priuatarum ut rerum fures. vitam agant in neruo & compedibus, publici in auro & purpura. Si vitæ, mortisque hominum tempus, ratio, & causa in Cælo est, quomodo prisce longævitatis, quæ aliàs nongentorum erat annorum, tantam nunc patimur epitomen? an quod sidèrum, seu rerum omnium vis languet ac deteritur? Sæntne Sol & Luna mutata loco, immuta lumine, potestate, & spatio? Qua Cæli facie & habitu anniuersarium Climactericum vnus est expertus Antipater? Sunt vitales in Ægypto partus octimestres, quidni & in Africa ubi Cælum idem est? Quis sit ut tempore Astroque dispari ortostot pueros vno die demetant morbilli & variolæ, etiam veteribus cognita; tot homines fracta naui vel acie, vnâ horâ vnoque genere mortis occumbant: & contra vno temporis istu nascantur Reges & inopes, serui, & Domini, ut fortunas, sic exitus dissimiles habituri. Est ubi qui in vitam editur fœtus, euoluto capite luctatur in angustiis portæ, diutulèque laborat circa humeros, erit igitur diuersum capitis & reliqui corporis fatum, si hoc rapidissimo temporis momento accipitur. Nulla prorsus Stellarum decreta sunt, neque causam, neque notam vllam habent, quâ quid futurum sit, præiudici ac definiti queat. In motu ac periculo multa & creduntur facilius, & finguntur impuni. Falli volentibus, nunquam defecere qui fallerent, qui hominum, & temporum definitione sublatâ, sua mendacia obscuritatis nube inuoluta spargerent. ut si quando veritatem casus imitetur, diuinos sensus assequutos se putent, qui humanis carent.

NIHIL itaque refert ad vitam, seu valentem, seu diuturnam, quale sit Cælum, plurimi quale solum, qualis regio & viuendi ratio, quale semen quod in fœtum cogitur. Huius vitio multi dum seruntur, dum corporantur, non annos, sed dies Climactericos in aluo Matris inueniunt. Nempe ut Archiecto sit ne domus duratura, sic Medico, cuiusmodi futurus sit vitæ tenor, ex primis quæ

faciuntur fundamentis, augurari licet. Inde est quod non rari ò humani generis pestes, heroicæ virtutis natos de se dant, & ex Heroibus gignuntur carcinomata. Est vbi Ars Naturæ vim insitam promouet, est vbi penè totam immutat. Hic olim mera barbaries, nunc Athenas ipsas Atticas reperias. In Stilpone, quem Astrologorum natio violentum ac mulierosum sinxerat, nemo vnquam vllum vinolentia aut libidinis vestigium vidit. Vt fuerit tenuis ac purum, aut pingue ac concretum Cælum, ita alia, atque alia valetudo. Ex Persea, quæ translata venenatam vim deponit: ex pestiferis oppidis, quibus viuo flumine in desidis aquæ locum infuso, simul est infusa salubritas, liquet quanti sit ad vitam momenti, quæ cuique regioni & solo subest natura. Cibi non conuenientis mutati, deficientis, intemperstui, magna vis, longæque maior vini: reputa quot Climacteres acciuerè profundiores cyathi, quibus multi mersi sunt; Totas aliquas gentes reddit *maiores* aquæ potus & frugis victus. Longæviore qui ex professionis voto suum fraudant genium. Qui in otio & lustris degunt, qui saginâ corpus offerciunt, mirum quantum de vitæ summa detrahunt Bene sit si his tantum difficultatibus miser prematur homuncio: datus fragili corpori animus, ad labores mollis, in molestis anxius, in timore humilis, quo ex fonte quid non ebullit mali? Harum profecto causarum incursione tardiùs aut citiùs vitæ stamen abrupitur. Senum quidem tempestiua maturitate caducorum, & in extrema velut ætatis tegula positorum, spiritus faciliè eliditur: at si ex instituto in ciuitatibus Libitinæ censu calculum ponas, tam frequenter quolibet anno, quàm sexagesimo tertio, huius approximatione reuera conturbantur, quibus omnino grauis est ætas, nihilque opis in ipsis ad bene beatèque viuendum, qui futuri desiderio, præsentium tædio ægri, in senectutem quam toties optatam, adeptamque demum accusant, sana consilia disfulerunt; Sapiens verò, qui ex quietè, purè, eleganterque ductâ ætate, corpore non animo senex est, qui omnia bona à seipso petit, sui cultor est, sibi valeat, secumque semper vixit, probè actæ vitæ conscientia letus ad diu meditatam mortem, quam Naturæ necessitas afferat, non trahetur, sed ibit certo gradu, erectoque animo, certus tunc esse viuendi finem optimum, cum integrâ mente, ceterisque sensibus, opus illa suum, eadem quæ coagmentauit, Natura dissoluit, & putrique domo discedentem animam transmittit in vitam omni bonorum genere circumfluentem.

Nihil igitur ab annis Climactericis metuendum.

DOMINI DOCTORES DISPUTATVRI.

M. Ioannes Antonius Bourgaud.

M. Ioannes de Bourges.

M. Michaël Langlois.

M. Robertus Patin, Præses.

M. Germanus Hurcau.

M. Michaël de la Vigne, Schol. Prof.

M. Hermannus de Lannay, Schol. Cenfor.

M. Philippus Harduin de S. Jacques.

M. Helias Beda.

Proponebat Lutetiæ IOANNES-BAPT. DE REVELLOIS
Ambianus, A. R. S. H. M. DC. LVII.

*cette thèse est la 1061^e de la liste VII
de in folio des thèses de la faculté.*